

आकाशवाणी जयपुर-अजमेर
प्रादेशिक समाचार

दिनांक 01.05.2025

समय: 18.45 बजे

- प्रधानमंत्री नरेन्द्र मोदी वर्ल्ड ऑडियो विजुअल एंड एंटरटेनमेंट समिट-वेक्स रो उद्घाटन कीनो-वे ई आयोजन ने भारत रा एनीमेशन अर ग्राफिक्स उद्योग सारु खास मौको बतायो।
- अजमेर री एक होटल मांय लाय लाग जावण ऊं चार जणां री मौत- मुख्यमंत्री भजनलाल शर्मा हादसा रे कारण झुलस्या लोगां ने ईलाज सारु हर संभव मदद देवण रा हुकम दीना।
- केन्द्र सरकार ई साल दो करोड़ 56 लाख मीट्रिक टन गेहूं री खरीदी कीनी।
- प्रदेश रा आतूणी हलकां मांय जबरदस्त गर्मी अर लू रा हालात-दोपहरां पाछे कुछ जिलां मांय आंधी चाली अर छांटो- छिड़को व्ह्यो।

000

प्रधानमंत्री नरेन्द्र मोदी कह्यो है के देश फिल्मां बनावण, डिजिटल कंटेंट, गेमिंग, फैशन, संगीत अर लाइव कॉन्सर्ट रा वैश्विक केंद्र रा तौर ऊं सामी आ रह्यो है। श्री मोदी आज मुंबई मांय वर्ल्ड ऑडियो विजुअल एंड एंटरटेनमेंट समिट-वेक्स रा उद्घाटन रे मौके बोल रह्या हा। श्री मोदी कह्यो के ओ भारत रा एनीमेशन अर ग्राफिक्स उद्योग सारु खास मौको है।

प्रधानमंत्री भारत री रचनात्मक माली व्यवस्था री अपार संभावनावां माथे ज़ोर देता थकां कह्यो के आवता बगत मांय देश रा सकल घरेलू उत्पाद- जी.डी.पी. मांय इण रो योगदान घणो बध जावेला। वे कह्यो के भारत, फिल्म निर्माण, डिजिटल विषय-सामग्री, गेमिंग, फैशन, संगीत अर लाइव कन्सर्ट रा वैश्विक केन्द्र रा तौर ऊं सामी आ रह्यो है। रूप में उभर रहा है।

प्रधानमंत्री कह्यो के भारत री फिल्मां अब दुनिया रा न्यारा-न्यारा हलकां ताई पूग रही है अर एक सौ ऊं बत्ता देशां मांय बतायी जा रही है। वे कह्यो के देश मांय ओ.टी.टी. हलका मांय ध्यान जोग बधोतरी व्ही है।

000

मुख्यमंत्री भजनलाल शर्मा अजमेर री एक होटल मांय लाय लाग जावण रे कारण व्ही मौतां माथे दुःख जतायो है। सोशल मीडिया पोस्ट रे ज़रिए श्री शर्मा कह्यो के हादसा रे कारण ज़ख्मी लोगां ने ईलाज सारु हर संभव मदद मुहैया करावण रा हुकम अहलकारां ने दिया ज्या है। विधानसभा अध्यक्ष अर अजमेर उत्तर रा विधायक वासुदेव देवनानी ई जिला कलेक्टर लोक बंधु अर पुलिस प्रशासन ऊं वाकया री जाणकारी लीनी। वे घटना री जांच कर र आगे ऐड़ा वाकया व्हेवण ऊं रोकण सारु ज़रूरी जतन करण रा हुकम ई दीना।

ध्यानजोग है के अजमेर रा डिग्गी बाज़ार मांय आज संवारे पांच मंजिल री एक होटल मांय लाय लाग जावण रे कारण वठे उत्तर्या चार जायरीन री मौत व्हे गयी। हादसा रे कारण ज़ख्मी व्ह्या चार जणां री हालत गंभीर बताई जा रही है।

000

सुप्रीम कोर्ट लारला दिनां कश्मीर रा पहलगाम मांय व्ह्या आतंकी हमला री जांच ऊं जुड़ी एक जनहित याचिका री सुणवाई ऊं नट ग्यो है। अदालत कह्यो के ऐड़ा कदम हिफाज़ती दस्तां रो

मनोबल गिरा सके है। अदालत मुद्दा री संवेदनशीलता ने ध्यान राखता थकां अर्जी दायर करण वाळा ऊं अर्जी पाछी लेवण सारु कह्यो है।

000

जयपुर रा राजभवन मांय आज गुजरात, महाराष्ट्र, ओडिशा अर हिमाचल प्रदेश रो स्थापना दिवस मनायी ज्यो। जळसा मांय राज्यपाल हरिभाऊ बागडे आं राज्यां रा स्थानीय रेहवासियां सागे बातचीत कर र वां ने शुभकामनावां अर बधाई दीनी। श्री बागडे आं लोगां ऊं वां रा राज्य, जिला अर गांव ऊं जुड्या रेहवण अर वठे रा विकास मांय सक्रिय भूमिका निभावण बाबत् कह्यो। ई मौके पुलिस महानिदेशक उत्कल रंजन साहू ओडिशा री नुमाइंदगी करता थकां वठे री संस्कृति अर राजस्थान मांय ओडिशा वाळां रा योगदान री चर्चा कीनी।

000

राज्यपाल हरिभाऊ बागडे आज प्रतापगढ़ मांय जिला स्तर रा अहलकारां सागे मीटिंग कर र केंद्र अर राज्य सरकार कानी ऊं चलायी जा रही जनता रा भला री योजनावां रा काम रो जायजो लीनो। वे अहलकारां ने सरकारी योजनावां ने टेमसर अर असरदार तरीका ऊं लागू करण बाबत् कह्यो।

000

लोकसभा अध्यक्ष ओम बिरला आज रेलवे रा अहलकारां सागे कोटा अर डकनिया तलाव रेलवे टेशन रो दौरा कीनो। आं टेशनां माथे करीब साढे तीन सौ करोड़ रुपया रा खर्च ऊं विकास रा काम कराया जा रह्या है। ई मौके श्री बिरला रेलवे रा अहलकारां सागे मीटिंग कर र विकास रा काम टेमसर पूरा करावण रा हुकम दीना।

श्री बिरला टेशन माथे काम कर रह्या मजूरां सागे मुलाकात कर र वां ने मजदूर दिवस री शुभकामनावां दीनी। ई मौके वे कह्यो के देश बणावण मांय मजूरां रो खास काम है। श्री बिरला मजूरां ने उपहार ही दीना।

000

केन्द्र सरकार ई नुवा सीजन मांय 256 लाख मीट्रिक टन गेहू री खरीदी कीनी है। खाद्य अर सार्वजनिक वितरण सचिव संजीव चोपड़ा आज नई दिल्ली मांय खबरनवीसां सागे बातचीत करता थकां आ जाणकारी दीनी। श्री चोपड़ा बतायो के सरकार रो मकसद ई साल रा आखिर ताई 312 लाख मीट्रिक टन गेहू री खरीदी रो लक्ष्य राख्यो है। वे कह्यो के ऑनलाइन पंजीकरण, टेम परां वजन करावण अर 48 घंटा मांय सरकारी मोल रो चुकारो करण ऊं गेहू री खरीदी ऊं जुडी प्रक्रिया अब किसानां सारु आसान व्हे गयी है।

000

राष्ट्रीय लोकतांत्रिक पार्टी-आरएलपी रा मुखिया अर सांसद हनुमान बेनीवाल राज्य सरकार ऊं साल 2018 मांय व्ही आर.ए.एस. परीक्षा री जांच सी.बी.आई. ऊं करावण री मांग कीनी है। वे आज जयपुर मांय खबरनवीसां सामी साल 2018 री आर.ए.एस. परीक्षा मांय धांधली व्हेवण रो आरोप मांड्यो। बेनीवाल एस.आई. परीक्षा ने ई रद्द करण अर आर.पी.एस.सी. ने भंग करण री मांग कीनी। सांसद बेनीवाल कह्यो के आर.पी.एस.सी. ने भंग कर्यां बगैर बेरोजगार नौजवानां सागे न्याय नी व्हे सके है। श्री बेनीवाल वां री मांगां माथे सरकार कानी ऊं ठोस कार्यवाही नी करी जावण री सूरत मांय आंदोलन तेज करण सारु चेतायो।

000

आज विश्व मजदूर दिवस मणायी ज्यो। देश री माली व्यवस्था मांय मजूरां रा योगदान रो दरसाव करण सारु हर साल एक मई ने मजदूर दिवस मणायो जावे है। ई साल रो मुद्दो **कार्यस्थल पर सुरक्षा और स्वास्थ्य** राख्यी ज्यो है। ई मौके आज प्रदेश मांय न्यारी-न्यारी ठोडां कार्यक्रम राख्यी ज्यो। सलूम्बर जिला रा जावर माइंस मांय राख्यी ज्यो कार्यक्रम मांय मजूरां रो मान करी ज्यो। मजदूर दिवस रे मौके अजमेर जिला दुग्ध उत्पादक सहकारी संघ डेयरी बूथ वाळां ने हर लीटर दूध री बिक्री माथे दस पैसा री बधोतरी अर पांच लाख रुपया ताई रो दुर्घटना बीमा कवर देवण रो ऐलाण कीनो। इण ऊं करीब दो हजार आठ सौ डेयरी बूथ वाळां ने फायदो मिलेला। झालावाड़ मांय रोड़वेज कर्मचारियां रा संगठन- इंटक रा दफ्तर माथे झंडो चढ़ा र मजूरां रा नेता एकता माथे ज़ोर

दीनो। भवानी मंडी अर झालरापाटन औद्योगिक हलकां मांय ई केई कार्यक्रम राखी ज्या। जोधपुर मांय केन्द्रीय संचार ब्यूरो री ओर ऊं विचार गोष्ठी राखी ज्यी।

000

प्रदेश रा आतूणी हलका मांय पड़ रही ज़ोरदार गर्मी बीचे लू बाजण ऊं जिन्दगी माथे घणो असर पड़ रह्यो है। आज ई बाड़मेर, जैसलमेर, बीकानेर अर जोधपुर जिलां मांय कठे-कठे लू बाजी। केई ठोड़ां पारो 45 डिग्री सेल्सियस ने पार कर ग्यो। ई बीचे राज्य रा कुछ जिलां मांय दोपहरां पाछे आंधी चाली अर कठे-कठे छांटो छिड़को व्ह्यो। भीलवाड़ा अर जैसलमेर मांय हल्की बारिश ऊं गर्मी ऊं थोड़ी साता मिली।

मौसम केंद्र जयपुर रा निदेशक राधेश्याम शर्मा बतायो के आवता 24 घंटां मांय तापमान मांय खास बदलाव रा आसार नी है। ई पाछे पारो 3 ऊं 5 डिग्री सेल्सियस ताई उतरण री संभावना है।

000

राष्ट्रीय परीक्षा एजेंसी-एनटीए चार मई ने ली जावण वाळी नेशनल एलिजिबिलिटी कम एन्ट्रेंस टेस्ट-नीट यूजी देवण वाळा उम्मीदवारां रा एडमिशन कार्ड जारी कर दीना है। उम्मीदवार एन.टी.ए. री अधिकृत वेबसाइट ऊं एडमिशन कार्ड डाउनलोड कर सके है। मेडिकल अर डेंटल कॉलेजां रा एम.बी.बी.एस. अर बी.डी.एस. कोर्स मांय दाखिला सारू व्हेवण वाळो ओ इम्तिहान दोपहरां पाछे दो बज्यां ऊं सिंज्यां पांच बज्यां ताई एक पारी मांय लियो जावेला। ई बीचे राजस्थान विश्वविद्यालय 2 अर 3 मई ने व्हेवण वाळा सगळा इम्तिहान टाळ दीना है। आं री नुवी तारीखां रो बेगो ई ऐलाण कर्यो जावेला। विश्वविद्यालय री ओर ऊं ई बाबत् आज सूचना जारी करीजी। विश्वविद्यालय विद्यार्थियां ने लगातार इण री आधिकारिक वेबसाइट माथे ध्यान राखण री राय दीनी है।